

Selamat Hari Raya Korban dari PM

Bahan asal dari Arkib
Negara Malaysia

KUALA LUMPUR, Ahad — Perdana Menteri, Datuk Seri Dr. Mahathir Mohamad dan Timbalan Perdana Menteri, Datuk Musa Hitam, mengucapkan Selamat Hari Raya Aidiladha kepada umat Islam di seluruh negara.

Datuk Seri Dr. Mahathir dalam perutusannya menyeru umat Islam supaya benar-benar bersatu-padu mencari jalan berkesan untuk menghentikan penindasan dan penghinaan pihak Isreal terhadap saudara seagama di Asia Barat.

"Mengecam dan mengutuk pencerobohan dan kekejaman pihak Isreal tidak memadai," tegasnya.

Dalam perutusan bersama isterinya, Datin Seri Dr. Siti Hasmah beliau berkata, umat Islam mestilah insaf akan nasib yang menimpa saudara-saudara Islam di Asia Barat selain dari bermaaf-maafan di hari yang mulia ini.

Di samping itu beliau menyeru umat Islam berdoa supaya rakyat Malaysia di tanah suci dipelihara Allah dan selamat kembali setelah sempurna mengerjakan haji.

Sementara itu Datuk Musa mengucapkan selamat Aidiladha kepada perajurit dan anggota pasukan keselamatan yang bertugas di perbatasan.

Datuk Musa juga menyampaikan takziah kepada keluarga dan saudara-mara mangsa pesawat Caribou Tentera Udara Diraja Malaysia yang terhempas di Cameron Highlands dua hari lalu.

Tujuh orang anggota tentera udara terkorban dalam nahas tersebut di Kilometer Empat ke utara Kampung Atap, Berincang Barat, pada hari Jumaat.